

四庫全書

集部

欽定四庫全書

夷白齋稿卷八

元 陳基 撰

律詩七言

次韻鄭有道喜王季野府判南歸二首

故人日下拜官歸
河水南來似帶圍
策馬遠游天府勝
食魚偏愛錦江肥
蠶叢故國山猶在
望帝荒祠鳥自飛
萬里欲將慈母線
芙蓉城裏製春衣

其二

海榴花放客南歸
喬木叅雲摠十圍
綠蟻奉親浮臘味
黃羊充饌割秋肥
恩承閩國榮三釜
心切灤都望六飛
錦里他年須報政
中天風露濕朝衣

次韻伯行投贈存齋

風捲浮雲雨滅埃
柳陰池館白蓮開
放舟有客尋源至
問字何人載酒來
剡曲願從安道隱
茂陵空嘆長卿才
角巾歲晚東林下
短策逍遙步紫苔

三用韻喜李野歸

手攬繁弱接忘歸
燕山射獵雪打圍
駝鳴關口曉風急
馬牧原頭春草肥
鄉樹喜瞻親舍近
蜀人爭候使星飛
忼慨平生王子贛
奮身叱馭肯沾衣

寄李野

積雨東臯如早秋
公子不來令我愁
題詩每憶許玄度
賣藥敢期韓伯休
柳陰繫纜水數尺
竹裏讀書風滿樓
長夏林塘何所似
浣花溪上瀼西頭

次韻劉德芳經歷

綺席無塵晏景光
佳人宮樣學時粧
座傳白雪高難和
澗采香芹淨可湘
綠水紅蓮新漕幕
紫薇青瑣舊朝郎
鳳凰城裏曾聯騎
一路看花到上陽

送徐勉之慈湖書院山長

兩度秋風刷羽儀
一官江海尚棲遲
簿書舊屈諸侯掾
經術今為學者師
天上文章回北斗
人間聲教極東陲
殷勤束帶升堂日
絕學憑將已易推

送錢士能建昌知州

建昌使君能且賢
青春結客五雲邊
致身得近二千石
事主已垂三十年
天削匡廬開菡萏
月明彭蠡浸嬋娟
行春處處花如錦
襦褲歌中咽管絃

送王壽翁歸閩

十日輕颿送海舟
七閩歸去近東甌
棹頭欲學孔巢父
養子不慚陳太丘
蠟房石暖隨時采
崖蜜風酣帶露收
故園歸老平生願
殊勝官封萬戶侯

次韻答秦文仲

艤舟復向三江口
載酒欣逢二仲來
邱園束帛已加璧
將相求賢無棄才
柳色綠欺頭上雪
桃花紅映掌中杯
還思別後無知己
從此柴門不浪開

其二

婁江繫纜已十日
故舊欣逢秦與文
氣壓元龍餘子服
賦高司馬九重聞
西山拄笏聊容我
東閣招賢欲待君
解却金貂換美酒
賞花時節正春分

婁江雜咏

畫鷁東來肅旆旌
郊原十日喜春晴
彎弓省隋雲邊翻
騎馬同登海上城
欲向草萊詢隱德
每因稼穡見民情
自慚肉食毫無補
慟哭空悲漢賈生

其二

百雉堅城鎮海頭
霜風中夜肅貔貅
乾坤浩蕩鯨波息
井邑蒼茫蜃氣浮
民瘼東來皆可念
妖氛西望未全收
將軍莫負黃金印
一鼓歸封萬戶侯

同文學古秦文仲游至正觀

西郭維舟水滿津從容鄭圃得尋真
蓬萊路隔人間世桃李花開劫後春
風雨或聞蛟杼響絃歌曾與竹堂隣
交游不忝羊求輩歲晚相期跡未泯

次韻答秦文仲郭義仲聯句見寄

客路尋常江海上春光强半雨聲中
習池無酒醉山簡蓮社有心期遠公
香燼旋溫婆律火茶烟輕颺石楠風
不因二仲聯詩至安得從容一笑同

次韻錢都事誠夫海上書事

左掖郎官漢客卿樓舡頻涉海濤平夢騎鸞鵠三山近
胆落鯨鯢一劍橫南斗星移天使下東吳兵振島夷驚
君須早決平妖策杖節還朝答聖明

送誠夫使吳門督漕兼寄分院同幕諸公

掛帆南斗畧扶桑奉使寧辭道路長轉漕復輸滄海粟
勤王爭羨紫薇郎風生漢節蛟龍避花繞吳宮雨露香
同幕故人如見問為言相憶鬢毛蒼

春日邵氏園池

寂寞園林帶夕暉昔年曾此戀芳菲
柳塘水暖鴛鴦浴花徑風酣蛺蝶飛
蔓草拂衣人不剪畫梁無主燕空歸
洛陽池館關興廢我欲春山賦采薇

送胡宣使赴都進表

使者樓舡上九天鯨波不動一帆懸
表章入奏三十里海宇中興億萬年
夏后山川仍職貢漢家勛業重安邊
從知此去多恩澤帽壓宮花錫宴還

送高起文歸越兼東陳伯昂王夢強

昔年同客百花洲，繡幕珠簾映綺樓。
歲月幾何成契濶，兵戈相見獨綢繆。
開樽坐對吳山雨，掛席行歸禹穴秋。
最憶吾宗陳伯子，笑談真有晉風流。

其二

甫里祠前憶舊盟，朝餐杞菊暮尊羹。
忘形真契葛天氏，共飲況有申屠生。
古來結交貴知己，亂後相別難為情。
西風又鼓濤江柂，王衍為君雙眼明。

寄楊文舉經歷

會稽從事獨逶迤，拄笏西山秀入眉。
欲振家聲遵伯起，不將文法泥宗師。
風塵此日淹騏驥，霄漢他年見羽儀。
一曲桓伊江上笛，夜深應有老龍知。

寄顧仲賢

為問平生顧文學，離羣近日復如何。
秋高禹穴官情薄，雨過越山詩興多。
久客念君髭未白，從君老我鬢先皤。
鑑湖一曲元無恙，歲晚相期載酒過。

次韻謝摠管送梅州判還崑山

畫舫撾鼓待朝回，山色留人不受催。
官酒醉淹羅袖濕，離筵愁聽竹枝哀。
秋風老憶淮南桂，暑雨晴收海上埃。
莫學君家子真叟，變稱名姓不歸來。

次韻謝侯寄梅州判

昔日吾宗陳太丘，為言梅福政偏優。

陳都事元禮常權知崑山州事故云

魚鹽爭集海市曉，雞犬不驚四社秋。
奕世美君仍吏隱，一廛老我欲歸休。
裁書更謝錢塘守，佳句難將雜佩酬。

次韻謝侯書懷

使君五馬早承恩
襦褲聲傳遠近村
可為長生居鄭圃
每因清嘯過蘇門
香凝燕寢秋將肅
露挹銀牀井不渾
同樂堂中賓客盛
旋烹佳茗當開樽

十一月晦與同幕諸公登南高峯因棹湖上小集二首

共上南屏第一層
海風吹鬢雪鬚鬢
山盤地脈來天目
城抱江流似蔣陵
近郭晝行多畏虎
並湖寒盡未收冰

倚闌閒說承平事知是毘盧劫外僧

其二

落日湖光艤畫舫買魚沽酒不論錢共過天下登臨地
却憶國家全盛年綠水映霞紅勝錦遠山凝黛澹如烟
相攜此夕干戈際一聽笙歌一慨然

正月五日省院諸公飲吳南城

每因公事少從容今日傳杯興頗濃飲散城南浮畫鷁
夢回江上聽疎鐘長風萬里飄歸雁疊浪千層駭蟄龍

同幕故人期不至曉山回首鬱巖巖

泊舟垂虹橋訪南北兩寺候蔡都事彥文

泰伯城中不少留垂虹橋畔却維舟
佛燈下照蛟龍宅蓮社平分雁鷺洲
王事有程塵沒馬僧心無垢月涵秋
多情為待同袍者徧倚闌干不下樓

次韻彥文寄謝省院諸公

西山雪後色逾妍拄笏相看每自憐
豈有異才參廟畧漫陪時俊列賓筵
玉笙錦瑟留人醉翠葉銀花壓帽偏

却笑當年潘騎省為誰雙鬢早皤然

其二

此日東吳接勝游風流欲與古人儔城南美酒春初熟
湖上魚簖晚未收才愧機雲還入洛功高絳灌重安劉
謀參帷幄輸公輩巢父歸歟盍掉頭

次韻孟天偉郎中看湖十首

海上初看一線低須臾排窾與山齊平吞百粵天為塹
雄障全吳石作堤浩浩鯨波流似帶紛紛蜎角鬪如雞

世間別有風濤險莫向平途信杖藜

其二

天風吹海恣崩奔一擲坤維勢欲翻
正爾斷鰲安地軸可容持鼓過雷門
驚濤怒激英靈氣斜日潛消壯士魂
却笑故都閒士女冶遊歸去近黃昏

其三

江源來自歙山幽潮勢憑陵江上頭
紫蓋黃旗收王氣素車白馬踏清秋
至今故老猶興慨自古忠臣不自謀

渺渺雲邊孤鳥沒
豈知人世有恩仇

其四

八月十八怒潮生
猛於突騎白於繒
風掀雲島神龍化
雷吼天門赤鯉騰
樓舡入海仙難問
鷗革浮江史可徵
揚旗勇踏濤頭去
除却吳兒孰可能

其五

千古英雄恨未消
海風吹上浙江潮
怒驅貔虎誰能敵
雄壓鯨鯢不敢驕
踏浪掀旗空遠迓
臨流捐袂若為招

扁舟浩蕩身先退
輸與陶漁共采樵

其六

雪湧潮頭萬疊多
秋風飄擊吼靈鼉
直疑碧海金鰲擲
復恐陰山鐵騎過
勾踐功名今寂寞
麻姑消息近如何
憑君更騁神明力
翻却蓬萊弱水波

其七

秋風酬酒待潮生
渾似羅江吊屈平
地下有靈驅海若
人間無主聽阿衡
恩仇莫辨君親分
忠佞難逃今古評

寂寞長洲走麋鹿不堪明月掉歌聲

其八

千古東南訖海潮摩娑強弩未曾銷
氣乘日月分盈縮聲振山河欲動搖
擊楫中流歌慷慨倚闌斜日鬢飄蕭
錢塘美醞秋仍綠更與靈胥酬一瓢

其九

風起城南思慘悽獨攜長劍倚長堤
未談秋水驚河伯先跨濤江掣海鯢
力障狂瀾扶砥柱手揮妖祲豁坤倪

東流不盡凭闌意長嘯歸來日已西

其十

每因潮候卜灾祥今歲潮頭百尺強千犀怒發鯨鯢吼
兩乳峯開龍鳳翔乘槎直欲訪河鼓懸水不須誇呂梁
徙倚江亭吾已老海風吹面髮蒼蒼

夷白齋稿卷八

欽定四庫全書

夷白齋稿卷九

元 陳基 撰

律詩七言

次韻高元善郎中見寄二律

憶昔同參雁鷺羣
每將騷雅佐人文
詩成嶰谷鳴風竹
琴罷瀟湘夢水雲
南浦離情波杳渺
北山歸思日紛紛
可憐滿地秋如錦
只有黃花好寄君

其二

詩酒相從歲已賒幽居人擬地仙家別來九陌風塵外
望斷五湖烟水涯書就蜀箋文勝錦宴歸漢署帽簪花
他年或遂投竿志著我秋江倚釣槎

元善嘗俾余記其所居松雲巢繼辱以詩為謝
因次韻答之

蕭蕭素髮魯東家豈有文章競綠霞高世羨君期太白
寓言容我詫南華神栖五老仙為侶夢繞三珠玉作葩

為問松雲在何許此中不遠亦非賒

舟中讀漢武帝紀

高王馬上爭天下丞相養民方致賢帝業不曾階尺土
兒孫何以弄緡錢長生始悞神仙術巫蠱終虧父子天
可惜春秋二三策獨留龜鑑後人傳

次韻葉德新江上觀兵

一水朝宗控百川著鞭此日許誰先手麾貔虎風生海
胆落鯨鯢劍倚天潮汐怒隨龍變化雲山高作鳳飛騫

元戎一鼓收南服持奉吾君憶萬年

三塔寺

江湖四月半陰雨山寺今朝方喜晴杖錫入城非避客
琅玕繞屋正啼鶯寶樹著花當座落蒼龍分水入厨清
好留一榻雲深處共話三生石上盟

過本覺寺訪了庵長老

無垢堂前曾屢過阿師行道近如何僧中此日如公少
方外向來名輩多一室寶烟飄爇納六時花雨落芬陀

寺門晝掩如廷尉滿地秋陰覆雀羅

寄顧高士

每憶吳門顧辟疆舊開池館帶滄浪
綠波芳草盟鷗鷺錦瑟玉笙悲鳳凰
座客詩成誰最好故人酒後我多狂
扁舟來往鵲湖上老到猶能賦草堂

寄鄭明德

牢落乾坤獨鄭虔丘園風雨故依然
腹藏玄晏書千卷身受滕君宅一廛
雲臥蝶迷遺世夢林居鶴避煮茶煙

揚雄自昔多奇字老我猶乘載酒舡

過三塔灣留題

綠水灣頭維畫舫白雲堆裡訪禪林上方樓閣丹青古
下界蛟龍窟穴深五月鶯聲山寂寂一簾雨氣竹森森
地霧不受昆明劫留得長松喜十尋

再次韻答明德

煉石無心補漏天幽栖環堵獨蕭然松蘿雨後生朝菌
藜藿年深沒故廬足濯滄浪池上水衣薰豕虱實中烟

林居似厭城南淺重擬歸來谷口舡

用韻答沈仲說

結客東吳憶盛年多君燕處每超然千金昔棄朱公產
一畝今無許子廛濯足洞庭天拍水掛帆笠澤柳含烟
相逢一笑榮枯外猶勝虛乘訪戴舡

寄錢成夫員外

千里從君客楚州故人吳下獨維舟關山別後鄉書少
淮海平來相業優龍虎帳中勞遠望鳳凰池上莫多留

平生愛殺韓司馬老我何妨讓一頭

寄蔡彥文都事

蔡子才多病亦多尺書千里慰蹉跎同游暫阻紅蓮幕
相寄慚無紫玉珂交義人人推管鮑新詩字字擬隋何
淮南賓客如君少未許淹留桂樹謠

九日

百年忽忽成何事九日匆匆不在家莫遣秋風吹短帽
羞將白髮對黃花詩因撥悶聊時賦酒為消愁亦漫賒

欲向楚城高處望不堪離思滿天涯

九日東同幕諸公兼寄吳中兄弟

官舍蕭條淮水濱一樽九日漫相親
那知黃菊籬邊客不笑紫薇花下人
秋鬢白嗔烏帽側良顏紅愛綠醅新
吳中兄弟應相憶悵倚秋風北望頻

阻風仲舉舟中小酌

千里旌旗映日紅一天秋雨忽濛濛
鄉書未有東南信客路不堪西北風
泛水芙蓉依繡幕背人鴻雁避雕弓

淮陽酒薄猶堪飲時復相逢共一鍾

墻角種菊三四本頗可觀

一官跋涉客天涯頗覺秋來興味佳有菊便同陶令宅
無錢誰笑杜陵家幽叢密護霜前葉嫩蕊輕含雨後花
賴有新詩相料理淮南酒薄不堪賒

淮陰雜詠

千里相逢淮海濱一枝誰寄嶺梅春老來易感山陽笛
年少休輕跨下人失侶雁如秦逐客畏寒花似楚遺民

每過百戰瘡痍地立馬西風為損神

其二

匹馬淮陰秋復冬每尋陳跡意忡忡
下鄉賓客貧無行南郭先生老病聾
漢室功高羞絳灌射陽門貴擬騫弓
至今七尺城東墓一酌寒泉感慨中

又

落木蕭蕭雁渡河西風嫋嫋水增波
甘羅營裡秋聲急朝信城頭月色多
淮市有魚聊可食楚山無桂不須歌

古今無限關心事付與當年春夢婆

又

江左妖氛掃未清山東豺虎又縱橫欲令斥堠收烽火
須挽天河洗甲兵老馬獨嘶時北望賓鴻相喚盡南征
腐儒愧乏匡時術搔首風前百感生

又

兵火燒殘百草根人烟無復萬家村黃金未鑄忠臣骨
白馬空招帝子魂易水有情人已逝睢陽無援事難論

何當親斬樓蘭首仗節歸朝報至尊

寄吳中分幕諸同志

故人入幕蘇臺上老我從軍楚澤隈
江海十年同聽雨關門千里獨持杯
適書到日多憑雁駟使來時好寄梅
慙愧紫薇花畔侶却依南斗望三台

寒菊徧開可喜

漫向隣翁覓菊栽晚花疎蒞一時開
寒欺楚澤三秋露暖透山陽十月雷
多事狂蜂忙未去惱人輕蝶競飛來

蕭齋對此無聊賴
莫怪頻傾濁酒杯

寄唐伯剛斷事

寒菊花開照眼新
客窓風物未全貧
旋賒陶令杯中酒
敢比羲皇世上人
官事有程仍笑傲
鄉書無便任因循
故人十月錢塘路
誰謂城西探小春

寄陳庶子參軍兼東饒介之郎中

楚天漠漠水迢迢
千里懷人不自聊
帷幄喜聞延曲逆
行間幸忝事嫖姚
江空不采芙蓉寄
歲暮惟歌桂樹招

華蓋仙翁如見問為言髀肉近多消

寄謝從義叅軍兼東唐伯剛斷事

江左風流謝使君賦詩渾是鮑叅軍一麾舊作錢塘守
萬里新空冀北羣官柳枝枝垂楚岸賓鴻个个入吳雲
題書為報西樞彥十月山陽尚有蚊

寄周信甫王叔明二長史

帷幄賢勞夙夜賓古今儒律兩彬彬漢廷重厚惟斯老
江左寧馨有幾人霜落吳門天接水雷鳴楚澤雨連旬

黃梁已熟淮魚白南國秋風時憶尊

寄錢伯行檢校葉德新掾史

少日錢君同汗漫中年葉掾共翱翔北窓坐傲羲皇世
南省行陪漢署郎笠澤芙蓉秋萬頃楚天鴻雁日千行
幼輿若許歸岩壑便結茅齋野水傍

寄沈達卿陳子方二理問

二妙相看如弟兄白鷗波上忝同盟老來轉覺襟期好
別後令人鄙吝生萬里貔貅方北戍九秋鴻雁盡南征

洞庭橘熟香醪嫩
心渴還思阮步兵

和周太常寄貢祕卿詩五首

兩翁臺閣迴翔日
千載文章全盛時
太史世家羣彥服
中郎筆法九重知
西清近識天顏喜
南海遙分漢節持
經緯論詩深有待
未容採藥訪安期

又

二老故鄉江漢東
兩家文獻夙相同
吳關望闕聯歸轡
閩海勤王謝轉蓬
禮秩漢郊修雍峙
道宗魯國仰龜蒙

共將千古文章印力障狂瀾洗陋風

又

世路間關嘆仳離斯文誰與挈綱維
近聞東觀除書下未覺南冠寵數卑
政倚叔孫興禮讓終知汲黯係安危
漢廷獻納須公等一代儀刑奕世垂

又

詞源變化共神謀一洗人間虺與蜉
老來偏厭干戈熾此去定分宵旰憂
館閣經傳劉向業關河人望李膺舟

白首自慚無寸補漫隨行伍事防秋

又

平生筆諫柳公權鶴髮還朝各皓然
棖桶棟梁收恐後麒麟鸞鳳覩爭先
太常議禮推王肅金匱紬書待馬遷
慚愧當年秦逐客只憑魂夢到鈞天

夷白齋稿卷九

欽定四庫全書

夷白齋稿卷十

元 陳基 撰

律詩七言

送彌陀保世衡聞人德機二解元赴省試

一舉收功古戰場計偕同上紫微傍
手攀明月分仙桂足躡青雲見玉皇
高第世推唐甲乙直言人比漢賢良
明年畫錦歸來日一色恩袍雨露香

送丁太初嘉常二貢士赴省試

兩賢攜手上南宮掛席關河得便風
欲把姓名題甲乙須將文字決雌雄
一經昔向江東學萬里今看冀北空
遙想殿頭臚唱畢五雲佳氣鬱葱葱

送牛述善郎中還朝

萬柳亭前一酒杯馬蹄踏雪上金臺
天門星應郎官至海岱春隨使節回
宣室復陪前席問上林曾壓衆芳開
諸公若話東南事楚澤無冰有草萊

自淮安使江南舟次通州寄同幕諸公

頻年共入嫖姚幙此日先乘使者舟
海色曉迎龍虎節天光寒動鸛鷖裘
山川咫尺分吳楚河漢尋常近斗牛
南鎖堰頭官柳樹春風相約繫驂駟

又

狼山山色碧崔嵬秋半從軍臘底回
壽酒欲歸吳下獻使星新自楚州來
江城見月思聯句駟路逢春擬寄梅
只待年頭便相會欣將懷抱為君開

由通州度江

白首輕拋種樹書，漫陪帷幄強馳驅。
半竿紅日辭淮甸，一席清風上海虞。
欲向中流安砥柱，恨無長劍斬鯨魚。
晚投言子祠前路，坐聽絃歌意有餘。

福山港口待潮

吳山如畫楚江平，稍得孤帆半日程。
潮落沙頭纔一尺，舟停江口復三更。
時清不識風波險，世亂方知性命輕。
坐擁貂裘待明發，臨流空愧魯連生。

癸卯二月十一日官軍發吳門

去年移戍秋將半今歲渡江春正分晉國偏裨歸宿將
漢廷旗鼓屬元勛戈舡十萬盡犀弩鉄騎三千皆虎賁
却笑高陽老狂客漫憑口舌下齊軍

二十日福山港寄省院諸公

漢將西征肅羽儀簡書日日有程期東溟潮上犀舡發
南斗星橫虎節移青入楚封山點點白添吳鏡雪絲絲
美人宴罷芙蓉署一色銀花翠壓枝

舟中看虞山有感

一望虞山一悵然
楚公曾此將樓舡
間關百戰捐軀地
忼慨孤忠罵寇年
填海欲銜精衛石
驅狼願假祖龍鞭
至今父老猶垂淚
花落春城泣杜鵑

二十二日狼山口觀兵

官軍野次狼山口
鉄騎犀舡盡虎貔
杼軸萬家供餽餉
旌旗千里亘江湖
膝行擬伏諸侯將
西縛宜申兩觀誅
淮海父兄爭鼓舞
將軍定是漢金吾

游狼山寺

天風吹上狼山頂看見扶桑日出初
淮海北來吞兩楚
江湖南去控三吳
珠宮貝闕馮夷宅古木蒼藤帝釋居
為訪祖龍鞭石處
拇窠履跡定何如

其二

鯨波渺渺四無涯
閭闔天低水可排
一塔撐空凌浩劫
兩潮爭港撼層崖
半晴半雨龍歸海
衝暖衝寒雁度淮
安得乞身依佛日
徧尋靈跡訪齊諧

其三

五峯相顧若支撐力障狂瀾與海爭下界人居河伯國
上方僧住梵王城佛庖香訝山無蕨公膳腥嫌市有蜚
王事匆匆策馬去落花啼鳥不勝情

寄朱佑之經歷

老我思歸臥紫霞多君能賦吐天葩十年跡忝姚姚幕
千里身輕博望槎楚甸風高塵沒馬蘓堤春暖柳藏鴉
何時共倒西湖酒爛醉孤山處士家

寄張長年都事

南京郎官也好竒文章欲以古為師獨來楚澤從戎地
長憶吳門並馬時二月西湖春爛漫百年北海酒淋漓
此心頗與君同調一曲梅花歲晚期

二十六日自通州赴淮安

海虞城外經旬泊狼五山前信宿留六計西來思撓楚
三軍左袒願安劉龍光夜吐雌雄劍魚尾朝啣甲乙舟
今日南風催掛席浪花飛雪打舡頭

寄夏仲信太守韓璧翁經歷姚伯升照磨

淮海從征道路長美人千里遙相望
無錢太守客盈座好事郎官書滿牀
花氣曉迷三竺寺柳陰晴繫六橋航
懸知小队行春處露濕馬蹄芳草香

高郵湖夜行天明過寶應

秦郵城外望安宜帆飽風清似馬馳
三十六湖春欲暮一千餘里客來時
背人鴻雁歸何急近海魚鹽利不貲
農事及時兵有律便無神寶亦何疑

二十九日至淮安城南十五里述懷

欲向江湖覓釣磯此心長與事相違
添丁未遂盧仝計
算老空知伯玉非
淮海草肥宛地馬
楚州人著漢官衣
將軍奏上平西捷
還許山翁倒載歸

到南鎖寄分省同官

故人近在淮陰郡未見先馳尺素書
知己每慚齊鮑叔
論人只許漢相如
便須為我占烏鵲
不用呼童烹鯉魚
自笑近來頭盡白
強顏乘馬事穰苴

三月十五日由淮安使江南別同官

三月淮南柳色深相看去住兩關情鶯因求友聲逾切
雁為離羣意不勝芳草將春青楚甸暮雲含雨碧吳岑
遂初自有平生賦何事馳驅雪滿簪

三月二十五日由吳門使杭

昔年戍浙今移楚新歲趨吳復使杭南北此身皆客路
東西何處是吾鄉野花送別紛紛落官柳縈愁故故長
漫道五湖春色好為誰消得鬢邊霜

閏三月四日夏仲信太守邀游飛來峯次顧子

經照磨韻

千岩萬壑响奔雷分得西天小朵來雲氣滿林山覬玉
松陰巾寺榻生苔煙霞竒跡何時遂猿鶴留人未擬回
今日使君蘓白輩醉歸城路近三台

其二

飛蓋今朝天竺寺泛舟昨日小蓬萊五馬旆旌三月暮
四山煙霧一時開蒼藤古木藏靈鷲絕壑奔流吼怒雷

使節行行趨雨楚，碧雲回首鬱崔嵬。

分省諸公邀集西湖

湖上相逢宴屢開，紫薇花下約同來。
水光釀綠凝歌袖，山色分青入酒杯。
蛺蝶影隨羅扇動，琵琶聲逐畫舸回。
獨憐忠骨埋芳草，南拱枝頭蜀鳥哀。

閏三月七日過三塔寺留別寬長老

軺車來往每匆匆，此夕相看一笑同。
軒外竹添千個綠，樹頭花吐萬枝紅。
茶烹日鑄龍分水，榻近雲巢鶴語風。

梔子雨肥蕉葉大愧無佳句續韓公

閏三月八日泊舟三塔寺新仲銘長老出城相

看

我愛水西新仲銘道空諸有話無生出城看客意最古
把筆題詩才更清杜若洲邊春欲暮鴛鴦湖上雨初晴
十載間關重相見深杯寧惜為君傾

吳江

釣雪灘邊暫泊舟晴江千尺飲長流吐吞日月天無際

出沒魚龍地欲浮濟世誰當扶砥柱乞身吾合老滄洲
裁書為問天隨子杞菊荒來又幾秋

初八日阻風宿吳江無礙寺

龍伯留人暫艤舟偶過西寺得詩流僧窓烟景五湖晚
澤國雨聲三月秋我欲掛冠來釣雪誰能作賦共登樓
此身何日都無礙共向毘盧性海游

西寺送道元信長老還吳興楊墳寺

翔鳳山前水亂流垂虹亭畔月如鉤賦詩不讓湯休輩

入社惟慚元亮濤夜雨西窓重剪燭春風南浦共維舟
他年一榻封禺下笑傲能容此客否


次韻謝元懿移居後見寄

羨君早學公孫龍堅白因時辨異同狡兔窟多寧遠害
鷦鷯枝小不禁風山林夢寐隨麋鹿賓主情懷類蟋蟀
幸有故人周閣老時時分祿餉而翁

其二

手植新松引舊蘿人間得失付南柯粟儲已罄琴書在

家具不如車兩多短屐肯嫌苔徑滑高軒時向席邊過
新詩惠我皆珠玉報乏瓊瑤奈若何



夷白齋稿卷十

欽定四庫全書

集部

夷白齋稿卷十一至

五

詳校官中書臣孫衡

中書臣劉源溥覆勘

總校官編修臣王燕緒

校對官待詔臣胡士震

謄錄監生臣高伯揚

欽定四庫全書

夷白齋稿卷十一

元 陳基 撰

長律

送顧用之知階州

磊落階州尹風流淮海人
剖符新出牧觀國早充賓
愷悌臨民意賢勞報主身
威儀何棣棣辭氣復恂恂
河水遙通漢天戈迥入秦
度關雞戒曉行路斗移春
鸚鵡如

人巧蒲萄勝酒醇王遵方叱馭張翰漫思萑芥宸憂黎
庶銓衡重守臣致身須老練報政莫逡巡

送謝叅政十八韻

帷幄掄材日君侯許國年三吳修職貢六合倚藩宣絳
灌功難並龔黃政獨賢金湯新設險琴瑟重張絃借寇
心逾切安劉策最全忠甘周顗泣勇著祖生鞭殺氣連
區夏妖氛亘海壖丹心期捧日赤手欲擎天綠愛蘇堤
柳紅依庾幕蓮此行真特達臨別更留連夜蹠西湖席

春迴震澤舡輕風催解纜落日慘離筵浩蕩十年客良
遲百慮牽眼青慚阮籍頭白事孫堅迹忝樞機近恩沾
雨露偏委身同草莽報主乏埃涓知己青雲上忘形太
古前願君容一壑隨分老林泉

挽安圖右丞

我昔遊京邑公方振羽儀諫垣推蹇諤經幄重論思國
器魁羣彥風猷竦百司讜言從忤世直道不容私落落
匡君畧桓桓輔世姿太阿元自利白璧本無疵河濱圖

身禦蒿顙誓手支此心叅日月沒齒却磷緇民亦多勞
只天胡不憖遺扶顛摧柱石謀國毀著龜垂死猶憂主
平生不負知顧茲忠孝訓與爾子孫期諡法原忠始思
光邁等夷衰榮增感慨存沒係安危墓木秋應拱風塵
日未衰傷心行道者和淚讀豐碑

挽邵同知

循吏古希有斯人今亦亡魂應歸海岱身已葬桐鄉官
近二千石年幾八十霜秋風悲拱木愛日在甘棠賓客

羊求輩兒孫王謝郎史臣司宸鉞宜與發幽光

聯句

至正十一年正月一日遂昌鄭元祐龍門僧良

琦臨海陳基聯句送匡廬道士子彥成歸越

兼柬蕭靖復廬益修

歲朝逢王春雨雪暗吳下行人當明發祐別袂慄莫把

飄飄賀監舟基蹀躞靈運馬山駟梅始繁琦溪舡浪仍

打行紆莊馮唵祐去結遠公社禹穴紬奧編基蘭亭集

羣雅神運鶴氅朗風標鵝經寫祐霞鳬繼遐躅千秋祝

純嘏基信憑回潮尾春融枯樟祐越臺瞰蓬瀛昏濤

駕龕祐基白戰隱鞍甲綠精酣觥祐智囊倒精悍詞

鋒發侈基蕭臺多神仙靈教本靜者道樞混沌滓語

穿脫謨祐但令冠峨峨基有羨綬若若滄海等梯米黃

金直土直接籬或落髮短褐不掩踝捷比矢離弦勇如

金躍冶青雲步伊始白雪和殊寡基土膏動勾萌春情

滿原野琦桂樹歌詎已柳枝折難舍基別夢梁月墮清

談松風灑

琦

蓬藿既可居
蠶服自堪鮓

基

望望玉山阿

來期卜燈炮

祐

絕句

高郵湖

春深湖水漾汀洲
耿七公祠在上頭
蒲帆十幅東風順
明日從君到楚州

次韻吳江道中

兩袖清風身欲飄
杖藜隨月步長橋
僊人有約歸林屋

共飲甘泉聽玉簫

次韻臨平道中

杖策從軍事戰征簡書人畏漢章程去年此日山前路
十萬妖兵一鼓平

題柯博士畫竹

羣玉仙人佩水蒼金莖分露服琳琅曾將天上昭華琯
吹作飛龍奉玉皇

題宋陵梅竹圖

自從廷論主和親毛穎陶泓入御頻數葉寒梢吹欲折
爭教扶起北枝春

題摩癢馬圖

將軍日日過南山射虎原頭暮未還獨繫驂駟枯樹下
秋風摩癢箭瘢痕

寒林讀書圖

側耳幽泉入窈冥近人嘉樹蔚空青掛冠擬事陶貞白
學注神農本草經

畫馬圖

殷郎妙寫三神駿彷彿一嘶風滿林如此權奇世常有
可能當價不論金

倪元鎮畫

西池亭館帶芙蓉雲水蒼茫一萬重此日畫圖看不足
滿簾秋雨夢吳淞

次劉德芳經歷韻

白露池塘野翠荷越羅衣袖覺秋多梨園子弟今華髮

唱得開元供奉歌

次韻送彥成玉山

石路穿雲海湧山潮來爽氣有無間
獨憐禹穴清狂客
買得扁舟載酒還

其二

着屐溪頭日日過驪駒歌斷奈君何
虎邱山下東流水
爭似春愁一半多

和玉山韻

西子湖邊蘇小宅錦宮城裏薛濤家來時豈蕊初含蕊
別後菖蒲又著花

又

愧我風情如柳絮多君才思似春江無端養得秦吉了
日日呼人向碧窓

東林丰楸題謝仲和墨竹

謝家公子晉風流寫竹渾如黃澹游道人相對東林下
滿室清飈生素秋

又

疎篁翠著滄洲雨老樹青含太古春想見解衣盤薄處
為渠爛漫寫天真

蒲柳鶯鵲圖

高柳風葉繁短蒲春露薄為問出谷心何如在原樂

山茶折枝圖

江梅與水仙難兄復難弟一節傲冰霜無心媚桃李

月季折枝圖

瑞葉時時綠靈葩月月紅天非私雨露人自競春工

臨平

氛霧不見人晨曦忽生嶺倉卒過臨平舟眠猶未醒

騷

悼鶴

并序

世稱浮丘伯善相鶴浮丘伯相鶴如伯樂之相馬所
貴乎良馬者非以其能千里乎而鶴固仙者之驥一
舉而千里者也然世無浮丘伯而鶴之能千里者豈

少哉彼羅而致之以充耳目之玩者雖復寵之乘軒
食以厚祿亦徒取其羽毛之潔白音聲之高遠舉止
之馴雅已耳非以其能千里也甚有鍛冲天之翮辱
青雲之姿傍徨蹙慙使與雞鶩爭稻稷競腥羶以支
朝夕之用餒而燕雀從旁鼓翼且得以睥睨而竊笑
之矣是以神消色沮懣惘低摧秋高露零引吭長嘆
若將求哀于人而卒無有知其意者嗚呼夫有仙驥
之才千里之志縱世無浮丘伯亦豈無好事者如支

道林和靖輩矜其懊惋養其羽翼以遂其軒舉乎然而不少隱忍卒以憤懣喪情偃蹇悒悒不樂而化悲夫故余為賦以悼之雖不敢自附上皇樵人若乃縊縊悲傷愍其不幸則亦庶幾勒銘之遺意云爾其辭

曰

吁嗟鶴兮孰使有千里之質而不翔寥廓乎彼天鳥獲貫于碧簇氏兮而爾乃不追夫矰繳乎汨雞鶩俾溷飲食兮孰若集瑤池而游冲漠也困幽樊以媒止息兮孰

若挾飄風而薄雲漢也浮丘邈其弗顧兮信斯生之不
淑彼支公或可幸而覲兮顧踟焉不屑此汙瀆載營魄
屯其道于冥漠兮秉明心逝將焉告山川紆曲兮天地
圓方爾神游兮爰翩翩乎帝鄉濁世多患兮天上差樂
御飛仙而下上兮侶鳳鶖而龍躍嗟爾鶴兮孰從而訊
之生曷喜兮死亦易悲苟庶乎其一致兮則余又奚愴
悅而獻歎

弔岳武穆文

亘天地而長存兮惟孝與忠參日月以齊明兮惟德與
功昔有宋之多賢兮禮彬彬其在魯彼絳灌或弗喻乎
文兮隋與陸豈良于用武何夫子之英傑兮文與武其
並施篤忠孝以為興兮載功德以驅馳當建炎之播越
兮遵典午之遺轍豈將相之無其人兮夫子獨臨危而
激烈友長弘于千載兮偕吳胥而上下倚嫖姚豈獨方
畧兮矧孫吳又長於用寡使君王而不忘嘗胆兮則功
業豈卑于范蠡使左右而不信夫讒賊兮則斯讎豈容

須臾而緩死彼便佞固不足誅兮此廷臣豈皆不淑懷
長城曾不少救兮棄神京逝將誰復嗚呼自古皆有死
兮余獨于夫子而永傷谷可變而為陵兮海可變而為
桑炳父子之昭昭兮益彌久而有耿光弔孤塚于西湖
兮拜新廟于北山踞陳辭而敬酌兮凜生氣之桓桓

弔徐節孝先生文

歲行聿其將暮兮弔余節于淮之陰出郭門而溯九原
兮余獨慕夫子而悲吟間嘗竊觀乎聖門兮每服膺于

曾氏後若人蓋千載兮夫子實窮窮乎踐履嗟事親莫
先養志兮夫子一何其恂恂謂事死有甚事生兮夫子
早已質之于鬼神充百行于一原兮其所養者正直炳
文質之彬彬兮信有言者有德昔有宋之重熙兮曰惟
以孝為治聖人作而萬物覩兮鳳鳥豈得高飛而遠逝
紛束帛又加璧兮眷側席于邱園育菁莪沒齒鄉校兮
禮彌至而道彌尊少余粵在束髮兮知嘉言之是服謂
君子之思孰先于善兮斯奉盈而執玉歲冉冉其不與

兮汨余未知所之叱其馭于九坂兮奈何不畏隕踣而顛躋奉遺體而式夫子之間兮凜淵深而氷薄反余躬其或庶幾兮尚惓惓于先覺率僚友而拜黃壚兮羞秋菊而薦寒泉仰泰山而企喬木兮誓有永而勿諼

清暉樓辭

并序

吳興沈仲說甫學古有文事大母無間言所居東林有樓曰清暉金華王君子充記之以文余因推本其志而為之辭曰

東林兮北渚有樓兮式宴以處
渠不腹兮丹不塗
杞園不過規兮方以為矩
環之兮樹竹植之兮蘭杜
白雲兮在上原泉兮在下
仰挾烟月兮俯臨風雨
山之峯兮水之浦
綠宛宛兮清暉輝其承宇
入事有親兮出游有所
昏兮旦寒兮暑溫清適兮
時以序原有杭兮隰有稊
軒有醪兮有有荇汲清流
兮甘如乳
寥幽芳兮菲菲襲余
鳴琴兮酌酒樂清暉兮
受天之祐

歸鶴解

并序

吳興沈仲子以所畜雙鶴善鳴者遺其姁魯施氏至
則喑不類常時且相顧低徊若悵焉有懷舊之意魯
施氏聞之復以歸仲子則欣然鳴且舞不輟赤城山
樵見而感之乃為作歸鶴解

客有羽衣玄裳過余而言曰吾胎化之屬也家于青田
毓貞姿于浮曠挺孤標于飛翰因金氣而乘火精兮稟
陽德而長年世宗長于羽族兮躬服馭乎神仙接帝子
之蛻旂兮乘大夫之華軒參鸞鵠于阿閣兮造鵷鷺于

九天挾浮雲而凌飛霞兮游清都而朝上玄顧嘗脫飛
彈于桂陽撫故鄉于華表橫江湖而徘徊望青雲之縹
緲渴想瑤池之泉饑憶瓊田之草金風颯而知秋玉露
零而知曉感蕙帳之夜空悵昆丘之路杳美荀環之純
孝樂蘇耽之好道托軒墀以並萃期歲寒以相保矧義
侔金石之固契協芝蘭之深始不問于青蠅兮終靡惑
于孔壬念懿親于疇昔修雅好于方今辱使者以將命
貽公子以好音余自慚于弱羽彼過重于兼金于是影

遲遲于中路情慘慘于故林目矐矐以乍晞雲屏屏而
載陰意欲往而復止目反顧而哀吟眷碧沼以默默盼
翠竹以喑喑豈伊人之不淑愴睽離之莫任幸愔然而
見惻獲遂余之初願覽歸途而照翩尋前盟以繾綣慕
求友之鶯鶯襲于飛之燕燕將翡翠以戲苔偕鳳鳥以
翔旬嗟汨沒于雞羣修羽儀于霄漢惟吾子之好修秉
中心之孔嘉假清言以達志庶察余之匪他諒去就之
不苟擔卒歲以婆娑余方俛焉以莊聽客忽不知其所

之但聞九臯之餘音如助余之嗟咨

夷白齋稿卷十一

欽定四庫全書

夷白齋稿卷十二

元 陳基 撰

頌

平江路達魯噶齊西夏祿實公紀績碑頌

今天子御極之十有七年為至正六年詔公卿輔弼之臣若曰朕將以天下之治責成守令爾尚各舉所知以稱朕意于是皆拜手稽首曰幸甚臣等不佞敢不慎擇

其人以無負聖天子嘉惠元元之意乎既退咸以四方萬國至于遐荒守土之臣莫不各以其職宣布上恩時節貢水土百物以供郊廟社稷神明之祀而平江為郡控帶楚越所部四州二縣地方千里海陸之產饒于古昔國家所恃以為奉祀根本所係實異他壤職師帥任保釐于此者尤難其選居久之有以西夏祿實公子約之賢為言者宰相曰是故同知濠州有德于民者乎此長者可以復明詔矣即奏為平江路達魯噶齊時至正

九年也公方持江西部使者節命下即由豫章趨吳郡
長民者方臨人以嚴而刀筆吏規規守文不知大體公
因憮然歎曰此風其可長乎不戢將敗吾政乃以旦日
謁宣聖先師飭學宮增弟子員禮聘名師用月書季考
之法程試之錄其中式補郡曹吏尋飾學宮牆廣倉庾
以儲廩粟買學宮南廢圃作靈星門以正廟堂公餘政
隙陞堂呼吏屬雁行立從容攷究修身理人之術出入
經史上下古今疊疊不倦時以為常郡諸生化之尋自

激昂以明經取進士登高第者至是彬彬焉公方務與民興利除害會有詔罷長生牛水深圍長蕩之屬省憲遣官與公循行其地而崑山嘉定瀕海事故之田病民者為尤甚公因自念使民安其田里而無愁歎之心者二千石之事也今聖天子下寬大之詔苟不以斯時悉除民所疾苦後悔將焉及因疏其害力請而免之吳介居東南道路之咽喉有田者常賦之外又以餘苗供郡城與吳江平望水陸駟傳勞來之需公曰此非政之善

者也乃以歲餘官糧變錢為子母月取其贏以次責郡
曹吏主其費號曰祇待民大稱便海運梗于寇行省委
公按兵崑山之劉家港公身先士卒僇力海事春夏兩
漕皆以時達京師淮右盜竊發攻陷江東西郡縣浙右
騷動省憲督吳郡募民大興築城之役周圍四十里費
且巨萬然皆不取給于官屬方盛暑公不忍重困民因
泣下時以身出入版築間勞慰之海盜復犯崑山公募
民為兵選官吏之家居者分守郡城時門之啟閉以備

巨測初寇之入杭也行省徵富戶引兵入援公曰蘇杭唇齒不應禍且及應之則民不堪命因發所募義兵五百人赴之未幾寇陷常繼入湖烽燧熾空鉦鼓四聞羽書告急旁午相望資糧兵械什物之求絡繹不絕人情洶洶公晝則督率趣辦供億紛紜夜則申嚴約束以死自擔民賴以無恐居久之朝廷除行省臣不遠數千里率蒙古軍備禦吳郡已而省臣調他省江浙行中書因檄公兼制軍事公夙夜鞠躬與士卒同勞苦然不動聲

色而賞罰號令視前愆飭居民安業遠近賴之間奉詔募民輸粟佐江西軍以多寡補官有差列郡承風應募比至吳郡公懇懇為使者言吳民困于和糴百需民價湧貴斗至錢若干緡小民艱食無措方發官粟賑糴之實無以應募使者感公言遂以所餘告身還朝廷時論譴之先是權酷官止收其稅後公私譙賀更取酒酤戶吏徒並緣乘隙甚者民至破家公議罷之征止常稅而已公學醇識正性尚寬和聽政決獄務本經義而參之

以章程秉志忠貞立己廉恕而將之以勤敏起家諸生
官至二千石而退然身若不勝衣始公之下車也士仰
其德久之吏服其能終也民安其業宰相奏公治行最
南東詔嘉之特命增公秩復公位三年而吳人室家相
慶曰聖天子以公保乂我百姓三載告成例當代復詔
以公私我使吾人有父母出有司命俯仰六載夷險一
節宴然不與隣郡之民俱冒矢石殞鋒鏑膏血塗野草
者聖天子之賜也盍刻石載德以昭示無極且公旦暮

入叅廊廟晉升臺閣勛隨位崇爵與德稱其大書特書
屢書不一書者太史之職也乃具狀授余俾論著公治
吳善政刻而頌之以無忘聖天子之賜公以成均上舍
生釋褐授濠州同知調南平浦城二縣令轉南陽府同
知富寧庫提舉尋改同知都漕運事由歸德知府拜監
察御史又江西廉訪副使除今職云頌曰

明明天子于惠兆民孰宣上恩曰在守臣茫茫疆理廣
禹舊跡孰先農人布時黍稷濟濟在廷奉詔拜手慎肅

乃僚傍求遠取九州立牧施及八荒各貢方物時節來
王璉茲吳會東南奧區厥土塗泥化為膏腴豈伊人工
勝于地力諄諄德音斯民之福孰將明命往綏茲土抱
其嬰孩授之父母宰相薦公天子曰宜彼誠長者朕用
勿疑始而吳政逞以刑罰始而吳吏拘以文法公寬理
之訓之經義大者賓興小者試吏詵詵多士更化翕然
飭其儒宮以表化源公教既施民瘼斯究田疇淪胥駟
犒何有公承寬詔上疏蠲租使者勞來責之吏胥海寇

梗漕公威却之舡粟億萬輓實京師蠢爾妖寇蜂起螳
聚蔓延江南屠州陷府公築郡城載高其雉公厲郡兵
載奮其士吳城匪城公仁可憑吳兵匪兵公義可乘公
哺我饑公拯我溺去其蠹賊滋我稼穡羽檄交馳以急
告公徵求調發斯萬不同公曰卹哉皆由王事敢不鞠躬
夙興夜寐有卓治行上達九重天子曰都予懋乃功有
臣若斯宜在左右重念吳氓失賢太守詔增公秩詔復
公位以公私吳實天子意公之為吏如漢龔黃公嬰其

變民獲治康公之愛民如鄭國僑始不忍欺終安其教
公留拊我公勿去我公不我遺我忍公舍公惠在吳公
勛在石天子因公眎此成績

海道都漕運萬戶府達魯噶齊托音公紀績頌
天下之本在京師京師所仰在海運海運所恃在舟楫
舟楫之利所以濟不通然振古以來有天下者未有道
海為渠轉漕東南億萬之粟灌注天府以備棗盛祿廩
軍儲之需如今日之盛者也益世祖皇帝宏規大畧所

以為聖子神孫萬世無疆之計殆天授之非人力也奈有司撫字乖方一旦鯨波鼓怒沮我糧道堅舟利楫蒼茫失措鞠為灰燼于斯時也軍國大計苟非得人以濟之則祖宗七八十年振古所未有之利將有臨流浩歎而已顧何益于事哉此海道都漕運萬戶府達魯噶齊托音公所宜大書特書屢書不一書者也初海道之失利也聖天子圖新漕政而難其人廷議奏請今樞密院斷事官臣晚因倣儻善事忠謹絕人讀書知古今達事

變屢執法御史府讜直不回天下偉之臣等敢昧死請
以漕事屬托音詔曰可時至正十缺年缺月也先是

每兩漕事竣漕戶每以隙時備器械舟楫必先期補製
謹風汛也自海道有變糧艘淪沒者叅半會公下車申
嚴約束且迫漕期衆皆凜凜不知所為公乃下令俾買
吳楚商舡往來江湖之愿售者并日兼工益小為大且
戒曰事貴神速議多決少兵家所忌此漕事吾以軍法
行之敢有不用命者乎兩漕賴之率皆以時達直沽公

行事精勇類如此上大悅詔賜上尊酒加之束帛公曰
此特事之權耳非經久計也易曰通其變使民不倦今
漕民告病舟楫不飭危道也變而通之其在斯乎乃移
文平江嘉興湖州松江諸路府選民力之勝任者補充
漕戶是時鯨波告息新漕之民利涉無虞因為之用而
軍國大計所謂萬世無疆者克復舊章褒勸之禮視前
有加而公之事集矣公雖任專海道然苟有惠生民利
社稷者知無不為去歲秋吳民阻饑公發漕帑買粟以

賑之今年春陽山愚民不逞縱火剽掠鼓行趨郡西門
公身先有司從數騎出萬死不顧一生殺獲甚衆居民
安堵省憲聞之皆遣使獎賀十五年缺月詔拜公為江
浙行中書叅政事提制軍民保釐東吳仍督漕運事寵
賚優渥昭懋績也漕民因有作而言者曰公糴粟賑民
民頌之以詩公殄賊安民民刻之以石公重飭漕政恢
復海道制權宜如裴耀卿謀經久如劉晏處身清潔仕
不廢學如韓滉唐有三人倚為鄴侯皆以漕運致位宰

相公今之鄮侯也三人之長公實兼之而頌聲不作非
曠典歟且公居漕臺則功在海運位執政則志存藩省
異日登台輔秉樞要則又將以德加天下區區之頌于
公何有哉雖然無言不訓無德不報詩之善經也乃磨
石徵文論著公漕政頌之公字明善世為蒙古部人頌
曰

昔秦輓粟漕運乃興一石之利百斛費并漢唐治之陸
運水行負擔操舟乘湍跨陵一或穿褒斜或歷底柱或

鑿三門或役女嬪百險備經萬夫疾首庸錢千計得不

盈黼^二

大哉皇元天闢漕渠匪陸以阻弗川以紓于廓

靈海括坤之區噓吸百源卑以自居^三

維皇道之濟險

以德海若駿奔馮夷効力掖我靈輶贊我文鷁一波不

興萬里寧謐^四

直沽之口析木之精糧艘會同伐鼓

脩六軍騰懽萬姓交忻飽我糗糧樂此富殷^五

大畧弘

規善建不拔詒謀無疆振古莫越豈揚鯨波百怪竊發

六

燔我樓櫓梗我糧道出沒波濤犯我城堡彼方雷吼

此寧電掃孰乖拊循致茲倣擾七既劫以舟又掠以粟

上缺築盛下虧廩祿軍無見糧民食半菽憂貽當宁議

諏秉軸八事有非常得人斯濟誰實堪之惟脫因民昔

居諫垣抗言不諱使督漕政庶展才智九君命既加公

責斯厚金符虎節銅章龜鈕秩長萬夫位逾列守公辰

在公公退及酉十公行雷動公止山立公令一申公事

畢集以兵治漕以權濟急勇輸糧儲往實京邑十一帝命

偉之賚錫有加公曰從權經久則邪法貴變通戶別等

差損上益下哀多就寡

十

漕民核實舟楫利完春餽夏

餉風往浪旋轉粟如山弗危以顛欣飛在後陽侯在前

十

昔焉助逆今則効順威德所加載以明信威德伊何

不驕不吝明信伊何克廉克慎

十

天子曰嘉事立功成

授以執政升諸外庭拜命分曹督餉治兵公文且武公

允且平督我漕務衛我黎民

十

公今在外保釐吳土邑

有長城民有父母公行居中晉位台輔室有棟梁穀有

甘雨

十

邑傳輿誦野播民謠或聞鄉校或采芻蕘謳歌

功德嘉美賢勞爰勒貞珉永繼風騷

銘

頤菴銘

山下有雷其象謂何曰維頤爾二陽四陰中虛外實下
動上止天地養物洪纖動植莫之有紀材成輔相聖人
之功亦正而已莫不飲食君子節之其生也舒莫不言
語君子慎之其德不孤上棟下宇動息節宣式燕以居
在己則祐及物斯溥惟聖之徒苟舍其龜又拂厥經征

言滋惑居則觀象動則玩占惟吉是適勿朶爾頤寧捫
爾舌貞哉不忒我作銘言敢告執事庶幾無斁

貞白室銘

并序

昔浙江行中書叅知政事太原王公以忠貞清白勤
勞王家其嗣季野以世家子入備宿衛未幾以恩授
成都府判官需次于吳即笠澤別業治燕止之室高
為尺者九廣加高之一尺環室之內皆飾以楮西北
南設一榻而以吉貞之精好者為簾子其東出入者

由焉季野夙興冠衣謁家廟禮畢退而休于斯圖書
琴冊惟意之所適而雅喜與搢紳章達者商確今古
詠歌風雅日以為常入其室者如在積雪之中而幽
懷靜趣殆不知有塵世也因顏其扁曰貞白屬其友
韋羌山人陳基為銘銘曰

其心貞其室白端厥居匪徒飾不緇磷視其跡勒斯銘
永無斁

吳興沈仲說得蘇長史舊硯名滄浪池臨海陳

墓為之銘曰

有蘇滄浪之硯泓乎池方以就矩圓弗規潤為文章炳其垂惟說尚友不詭隨尚實用旃永弗隳

緩軒銘

并序

吳郡隱君子沈仲說甫以訥名在既自為之箴復以緩名其軒屬余為之銘曰

古之君子夙夜孜孜居則三省行則再思下堂而傷足者數月猶有憂色佩韋以自戒者百世而名不衰既恂

恂乎捫舌之訓復凜凜乎履冰之規勿行而使手足無措勿言而使駟馬莫追故奔車之上無仲尼覆舟之下無伯夷我思古人勤謹是飭濟以和緩剛柔兼克我行勿趨篤敬以為興我言勿尤忠信以為樞勿亟勿踈以適乎中庸之途噫嘻非若人是勗而誰與

箴

潛心閣箴

吳郡陸養正扁其坐曰潛心徵言于余因誦所聞為箴

以告之曰物無二本人無二心孩提之童絕乎堯舜也
兔置武夫文王莫欺達巷黨人孔子莫逃也飛廉惡來
非不足箕子比干非有餘也道之則蒼舒庭堅反是則
檮杌饕餮也君子潛心往行前言善乎我師不善我戒
也楊墨學仁義似是而實非柱下言道德紅紫之亂朱
也必出門使民如雍之事斯語參前倚衡如師之書諸
紳其殆庶幾也耶

贊

劉文正公小像贊

并序

世祖皇帝有帷幄之臣曰故太保文正劉公間關金
季處君子之所不得已則毀冠薙髮寄跡竺林柱下
法中亦有所不惜一旦乘風雲之會遙見龍之運一
言稱旨則不顧萬死一生以野服冒危險備顧問亦
有所不避及大勛已集四海一家坐而論道得君子
之時則建國號定都邑頒章服立朝儀事無巨細以
身任之亦有所不讓益公之學內聖而外王公之道

逃禪而歸儒其事業則輔主而庇民也祖宗以馬上
得天下而公首以詩書開治道國家以百戰定萬方
而公獨以不殺啟上衷中統至元以未開國元老出
處始終追配古人天下識與不識僉曰王佐之才則
公也雖欲謙退不居得乎自古王霸之業有君而無
臣固不可有臣而無君亦不可故非世祖之雄畧英
斷不能以用公非公之博聞應變不足以佐世祖噫
古之所謂窮則獨善其身達則兼善天下非公而誰

與今淮南行中書省照磨曰惟敬者公之裔也以公
小像示余余作而歎曰九原可起吾從之矣乃再拜
而贊曰

心晉道安迹唐李泌道該百氏而通學究天人而秘齊
有夷吾則稱伯漢有子房則成帝始逃佛老益無為而
不為終佐唐虞亦正其義不謀其利置之邱壑則赤松
為朋巢由為侶居乎廟堂則黃河如帶泰山如礪不知
者求公畫圖之間其知者索公形骸之外嗚呼益未易

以測其際也

謝叅政小像贊

觀其容若有憂于斯世也察其心盖有求于千古也其
坐也若思其行也若有所之受君之赤子而乳哺之其
樂也熙熙其處也若默其出也惟道是適故論于帷幄
也弗忒其見善也如有所弗及其好賢也如有所弗立
故施于廊廟也弗以緩而先急紹乃烈祖友時卿輔左
文右武以復王土人之望也如百穀之于甘雨嗚呼吾

聞跡雖纓于軒冕心不忘于山林若人也斯可以齊得喪而同古今矣乎

月上人像贊

以上人為天台氏耶則赤手搏空了無所著以上人為非天台氏耶則開口說法無非糟粕當其雨華堂上聽赤髭大士授記則百年老蚌出明珠及白玉峰前為一切衆生開示則萬古水輪湧寥廓此為伯明月公之相豈可以世諦語言偷度耶

蘇昌齡小像贊

以方寸之心而包括宇宙以七尺之軀而馳騁古今聳
聲名于廟堂之上匿光曜于澗壑之陰含冀北空羣之
足而弗御棄鄧林擎天之幹而弗尋豈伯樂之志而匠
石之心也耶

雜著

原器贈葉德新照磨

天下之器有大小而其為制有程度宮室聲樂衣服舟

車皆器也先王之制宮室其用材也必使大者為柱小者為楔長者為榱短者為橑為侏儒而後上棟下宇之器備至于音樂衣服舟車之器亦莫不皆然否則琴瑟車張柱楔異施布帛繆用水陸倒置以之居則不能蔽風雨調則不能和音呂服則不能禦寒暑乘之則不能任重以達之天下而器非其器矣先王之制國也亦然人之為人也不一其材而國之用材也不一其能眎其長短大小旁羅而並蓄之使職其職者各盡其力而責

其成善制國者也吾為天下誦斯言久矣鄱陽葉君德新東髮讀父兄書既長以六藝百家自緣飾從東諸侯游為郡府史籍籍有聲流輩問吾素聞其在甌越時佐郡理官治獄活不當死者數百人甌越間人至今稱之及余以樞密都事左右司員外郎待罪江浙行省文武兩府而德新由漕史辟掾行中書辱同在幕下德新出則操章程叅紀律從將相征討不庭雖犯霜露冒矢石不避入則與郎吏百執事進退廟堂鞠躬盡瘁務是

非非以忠所事俛仰六七年如一日未嘗以利害為趨舍余恒為之語曰德新有用之器也今年將相多其勞承制擢德新行中書賓屬為照磨余又欣然謂僚友曰方面大臣夙興夜寢思欲與四方士大夫共天下股肱之寄猶宮室之于材木音樂之于琴瑟衣服之于布帛舟車之于水陸不啻也德新以其所抱負從容于規矩尋尺抑揚輕重之中殆琴瑟之叶和柱楔之中度布帛之適體舟車之服習有素者乎充是以往等而上之益

無施而不可也嗟乎使制國者舉能使大小合度長短
中程任其職者各得展其才則士之如德新者將不可
勝用矣作原器至正二十二年六月庚子述

諭圃文

永嘉余唐卿甫寓于越治圃號菜邁夷白子為著諭圃
文俾執事者歲時申圃政備菜邁氏掌故之一菜邁氏
之圃在越桐桂里歲仲春土膏脈起將有事焉先期具
畚鍤羞酒肴明日盛服謁后土氏東向立召圃之老者

拊蓀具告之曰嗚呼若知菜之為用乎先王為耒耜教
樹藝五穀立疏寔並稱焉太史公書稱千畝薑韭其人
等封君龔遂令民種葱本五十韭薤畦各一宋宇種菜
品三十閔仲叔飮反無菜仲叔固誠貞士哉大圃與農
功角故歲無穀曰饑無菜曰饑甚矣水旱蟲厲凡以賊
吾圃弗可以弗戒又曰若屬任吾圃習圃事勿恣捕兔
敗吾瓜勿私利盜錢耗吾薑勿縱逸馬踐吾葵勿苟媚
馬齒苦苴辱吾嘉蔬泔芹可以獻吾君菜可以享吾師

並可以餉吾賓頻繁可以徼福于我鬼神吾用有常度
若亦永與有利又曰吾貴弗逮龔葛氏敢忘此味富弗
擬封君曷敢慢此並貧弗讓仲叔氏之徒曷敢廢斯圃
然有圃貴有政無政則捕兇勿禁暴于水逸馬弗閤烈
于旱盜竊弗戢酷于蟲厲馬齒之害弗勝茂草歲且告
饑而圃已墟矣嗚呼禍福若是其昭昭也吾申用顯告
若尚慎聽毋忽往率乃屬力圃事用底有秋其毋斁

諭童文有序

陳子之居有劣犬日走雞羣冲冒馳突狡焉自肆雞
不勝其橫則蒼黃鼓翼錯愕號叫若求哀于人陳子
閔焉命童設閑以衛之童或懈則其橫愈甚乃為文
諭童俾毋忽以貽雞害具辭曰

后皇育物莫靈者人惟人配天莫貴者仁人必有家家
必有畜彼畜焉依隸于僮僕惟犬司夜厥警有常惟雞
司晨厥聲孔臧晝夜是需有如水火所貴相生不取相
禍昔人有犬乳而求食雞哺其兒以朝以夕今我有雞

三五為曹恃僮為命載啄載遨僮食主祿當從主役相此犬雞惟僮是職犬夜而嗥人誰爾憎雞旦而鳴人誰弗與雞或失旦其責斯厚犬而失盜其罪孰宥今雞有時人焉是賴犬而暴之僮可勿戒惟犬與雞固皆人畜飲不同牢食不共粟昔能哺兒今乃相賊豈余匪德抑僮罔飭僮而弗恭雞犬乃攻攻而弗禁咎則由僮僮職不修雞失其所主不督僮怨將誰處爾雞與犬于僮何有一安于栖一謹于竇我非私雞僮勿縱犬以是示諭

僮敢不勉

說舟贈謝從義

吳興謝侯守杭之三年擢贊太尉府為諮議叅軍其赴
吳也臨海陳公合同僚若干人取杭湖山之壞麗與前
代名蹤勝跡之可賦者分韵迭詠餞侯于舟因拊舵而
告之曰侯亦知舟之為用乎夫舟所以涉川而濟險者
也其所任亦重矣然必有所需而後可以致其用焉舟
之所需其類不一而曰楫曰櫓曰帆皆有職于舟者也

舉是數者各職其職矣然而不聽命于舵則進而或却行而或掣未見其能濟也夫舵者固舟之司命乎天下之泛海者必由江河彼瞿唐灩澦龍門砥柱其尤險者也雖有堅舟利楫而所需或勿備即備矣而操之或不得其要則亦不敢以言濟其或倖而濟焉非舟之福也夫川有遠近而舟則有小有大舟之大者其任重川之遠者其人能彼吳越之人相救如左右手者操之得其要也舟中之人皆敵國也不得其要而操之或移左置

右又或不能無偏重也蓋操舟固難而無偏重為尤難
非惟古為然也今則猶然也謝侯文武忠孝為國股肱
既以身先舟人鼓柁于吳興停橈于樵李矣及弭櫂于
錢塘夷猶于潘臬播循良以為風泳豈弟以為波而淪
胥于溝壑者莫不得侯而後濟而侯則未始有難色也
今也轍師帥之任操帷幄之樞又將身先舟人握江河
司命之航運吳越左右之手救中流遇風之人以涉于
海舉焉而措之宜益無難者矣夫任重而不偏則致遠

也不泥雖或龍門在前瞿唐在後然能緩以將之翕而張之重以持之險而夷之未必非舟福也凡分韻賦詩以壯侯之行者皆同舟之人期必濟于侯者也侯尚無以不難為難也哉至正二十一年二月丁酉郡東門舟中書

丁彥明字說

淮南丁公彥明問其字之義于余余為之說曰君名鑑鑑所以辨妍媸也人情莫不喜妍而惡媸彼鄙忘之美

不及徐公亦遠矣然內而妻妾外而賓客或私焉或畏焉或有求焉卒莫敢為直言者及窺鑑而視則其不及也瞭焉夫鑑初何容其心哉亦無私無畏無所求而已前志有之以銅為鑑可正衣冠以古為鑑可知隆替以人為鑑可明得失彼鄒忌之鑑何鑑也曰人鑑也何以知之益事之有是非人之有善惡猶貌之有妍媸也彼辨妍媸者必以鑑猶察是非擇善惡者必以理理者天之所以予人人之所以為鑑也明者無所容心于是是

非非善善惡惡之天也向使鄒忌朝服而衣冠緣飾以
自矜興焉而不窺鑑寢焉而不自思則忌也將終身以
美驕天下而齊之君臣未可知也及一旦窺鑑而妻妾
賓客舉不足以蔽其天而齊國因庶幾矣燕趙韓魏聞
之于是相率朝齊而六國之臣皆自以其明不如忌忌
之鑑夫豈異于人哉亦不蔽其天而已丁君束髮從戎
授之將相自起家列校服勞王官而未嘗以材武器能
自表暴其鑑之得于天者厚矣蓋亦觀于內外疎戚亦

有私己畏己有求于己者乎反而窺之亦無所容心于其天者乎古之君子或佩弦或佩韋或銘諸器物皆所以去其蔽于人而充其得于天者也今也奉以周旋不假諸物而是是非非善善惡惡之天不過因其名字而充之不益親且切乎揚子雲有言歸驥之馬亦驥之乘也希顏之人亦顏之徒也彥明其尚希哉至正二十一年五月甲子書

鶴瓢說

瓢與鶴非同類也而鶴之稱鳥乎始始乎形之肖爾瓢之種瓠也而瓢之制烏乎始始乎始用瓢者爾均之為瓢也然使其種大而實五石祇見其瓠落無所容未必其能用也惟其小也而又肖夫鶴蓋小者人之所易習鶴者人之所同愛以易習肖同愛噫嘻吾知其弗棄矣吳門李士明得鶴瓢于青城山道士道士以瓢自隨初不意其予士明士明之未始與道士接亦不意其得是瓢瓢乎果孰生爾孰肖爾而取予亦孰主張爾乎吾聞

昔有辭天下而受瓢者夫以天下易一瓢其所取亦廉矣然亦不以有瓢為樂而卒棄之今士明之得是瓢既服用之又圖其狀詠歌之不少置若將終其身樂有是瓢者士明之于瓢誠厚矣雖然藏舟于壑夜半有力者負之而去士明之弗棄瓢士明之責也士明亦知自盡其責而已而其責有弗在士明者亦不暇為瓢計也

夷白齋稿卷十二